

奴婢七口田三十結官其一子副使柳淦書狀官鄭楹加資賜奴婢田結有差十二月丁亥朔領議政鄭太和延陽府院君李時白請對上引見于廬次兩相極陳不可不移御而儒臣每以鎮靜為言豈以是持難耶妖不勝德固是正論今殿下上奉兩慈殿決不可徒為持重也請速移慶德宮上從之○太學生尹抗等請從祀故宰臣李珣成渾于文廟疏五上竟不許○戊子夜一更有氣如火光○己丑命下供上紙伍十卷於戶曹俾補慶德宮修理之用○掌令李奎持平閔光燭啓曰凡臺席之上既主其論退乃推諉於人欲取媚於被論之人此實賈豎反復之態也頃者金益廉之為掌令也以山陵擇吉有違五月之制請推禮曹堂上旋抵書於判書尹絳之子趾美以為同僚黃儁者發論而渠乃隨叅云此則雖以趾美之營救益廉亦不得謂之全無也此說騰播人皆駭憤則益廉乃於諸名士會坐中面斥儁者欲實前言人之無耻何至此也有一名宰言其儉邪不可不劾則益廉一日三作書於儁者要為渠發明終始回邪之狀令人不忍正視請金益廉削去仕版黃儁者同叅請推之論仍徃見尹絳亦未免瓜田之嫌請罷其職上從之初掌令鄭樸首發此論而掌令鄭繼胄以為儁者所失不至如益廉而混施一罰不當遂至引避奎等